

四庫全書

集部

欽定四庫全書

後村詩話卷十二

宋 劉克莊 編

張祜金山寺云僧歸夜船月龍出曉堂雲樹影中流見  
鐘聲兩岸聞孤山寺云斷橋荒蘚合空院落花深孟浩  
然宅云益簡雖持節襄陽屬浩然送人嶺南云珠繁楊  
氏果翠耀孔家禽別甥云偶作魏舒別聊為殷浩吟靈  
隱師上人云貧知交道薄老信釋門空題惠山寺云潭

黑龍應在巢空鶴未還又云中擘亭前棗教郎見赤心  
又云青雲舊李白憔悴為酒客贈內人云斜拔玉釵燈  
影畔剔開紅艷救飛蛾退宮人云開元皇帝掌中憐流

落人間二十年長說承天門上宴百官樓上拾金錢

劉屏山不見金錢打

著人之句本此勸飲酒云燒得硫黃漫學仙未如長付

酒家錢竇君不吃齊推樂却在人間八十年邠王小管云

號國潛行韓國隨宜春深院映花枝金輿遠幸無人見

偷把邠王小管吹又云號國夫人承主恩平明騎馬入

宮門却嫌脂粉污顏色淡掃蛾眉朝至尊張祜崔涯同時齊名同客淮南時海內承平揚州繁華為天下第一兩生以風流自命所謂十二紅樓名姝角妓得其一盼聲價為重祜詩有天下三分明月夜二分無賴是揚州及人生只合揚州死禪智山崗好墓田之句其放浪如此然五言如斷橋荒蘚空院落花之語林和靖有妙入神之褒同時杜牧亦云誰人得似張公子千首詩輕萬戶侯今祐詩存者僅四卷爾然則散落多矣涯詩未之見

當攷

錢起海州云山城仙島出海日印堂開又云春泉洗藥

暖晴日度花遲又云入雲投館僻采碧過帆遲又云漢  
幟遠成霞胡馬來如蟻又云竹壇秋月冷山殿夜鐘清

又云海潮連月上舟火度煙來又云曲終人不見江上

數峯青不犯詩題一字而意在言外又云求仲應難見殘陽且掩關

又云秋入并州路黃榆落故關孤城吹角罷數騎射鵠

還帳幕遙臨水牛羊自下山征人正垂淚烽火起雲間

又七言云溪雲雜雨來茅屋山雀將雛過藥欄春郊云  
東風好作陽和使蓬草蓬花報發生題焦道士云綵雲  
不散燒丹竈白鹿時藏種玉田病鶴云獨鶴聲哀已摧  
折沙頭一點留殘雪驚羣各畏野人機誰肯相將霞外  
飛不及川龜長比翼隨波雙泛復雙歸碧海滄江深且  
廣目盡天倪安得往雲山隔路不隔心宛頸和鳴長在  
想何時白霧卷青天接影追飛太液前

郎士元送李騎曹云河來當塞曲山遠與沙平寄源公

云罷磬風枝動懸燈雪屋明謁傅大士云此方今示  
滅何國更分身贈韋司直云客來吳地星霜久家在平  
陵音信疎題精舍寺云月在上方諸品靜僧持半偈萬  
緣空江南尉問俗云避地衣冠盡向南錢起與郎士元  
同時齊名人謂之錢郎二人詩骨體弱而力量輕然警  
句膾炙人口者不可泯沒錢古詩如病鶴篇亦有意味  
郎七言多新意余選絕句錢取五言十一首郎取五七  
言各一首余記唐人雜書載士元常對客有馬令無茶

分之戲北平王一日飯客士元預焉坐間北平醉飽設茗供連沃數椀士元老不能禁即席吐利交下滿坐大笑今不憶出處當歎

益郊五言云試妾與君淚兩處滴池水看取芙蓉花今年為誰死長安春草云乃知田家春不入五侯宅又云萱草女兒花不解壯士憂又云野客雲作心高僧月為性又云風葉亂辭木雪猿清叫山又云借車載家具家具少于車又云盧仝歸洛船崔嵬但載書又云閒似獨

鶴心大于高松年又云拾月鯨口邊又云天津橋下冰  
初結洛陽陌上行人絕榆柳蕭疎樓閣閒月明直見嵩

山雪

賈島五言云養雛成大鶴種子作高松又云白石通宵  
煮寒泉盡日春又云竹籠拾山果瓦瓶担石泉又云馬  
曾金鏹中身有寶刀瘢又云山尋樵徑上人到雪房遲  
又云寒草煙藏虎高松月照鷗又云石磬疎寒韻銅瓶  
結夜漸乂云疎衣蕉縷細爽味茗芽新乂云鳥歸山有

跡帆過浪無痕又云鳥宿池中樹僧敲月下門又云汲  
井嘗泉味聽鐘問寺名又云高頂白雲盡前山黃葉多  
又云白髮無心鑄青山去意多又云秋風吹渭水落葉  
滿長安禹留疏鑿跡舜在寂寥祠又云秋月離喧見寒  
泉出定聞又云木深猶積雪又云一日不作詩心  
源如廢井又云落日恐行人又云詩隨過海船七言云  
古來隱者多能卜欲就先生問丙丁又云霜覆鶴身松  
子落月分螢影石房開唐詩人以島配郊又有島寒郊

瘦之評余謂未然郊集中忽作老蒼苦硬語禪家所謂一句撞倒牆者退之崛強亦推讓之島尤敬畏有自從東野先生死側近雲山得散行之句以賈配蓋是師與弟子並行也賈五言有晚唐詩人不能道

姚合五言云水氣詩書軟嵐煙筆硯濃又云尋山屐費齒書石筆無鋒又云夜猿啼戶外瀑水落厨中又云映竹窺猿劇尋雲採鶴情又云愛異嫌山淺尋幽喜徑生又云鷄鷄玉居士顛狂不稱時棄嫌官似夢珍重酒如

師又云無竹栽蘆看思山疊石為靜憲留客話古寺覓  
僧墓唯應尋阮籍心事遠相知又云研露題詩潔消冰  
煮茗香又云野客嫌知印家人笑買琴又云寫方多識  
藥失譜廢彈琴又云酒熟聽琴酌詩成削樹題又云古  
廳眠易驚老吏語多虛又云教僕認書簽又云畫壁半  
陳隋送邵州使君云驛路算程多是水蠻州管地少于  
山惜別云似把剪刀裁別恨兩人分得一般愁寄白傅  
云詩中得意應千首海內嫌官只一人亡友趙紫芝選

姚合賈島詩為二妙集其詩語往往有與姚賈相犯者

按賈太雕鐫姚差律熟去常柳尚爭等級

溫飛卿五言云雞聲茅店月人迹板橋霜又云楓落見  
猿過葉乾聞鹿行又云牧羊燒外鳴林果雨中拾又云  
拾萍萍無根採蓮蓮有子不作浮萍生寧為藕花死俠  
客行云欲出鴻都門陰雲蔽城闕寶劍點如水微紅濕  
餘血白馬夜頻驚三更灞陵雪七言云槿蘿芳援近樵  
家壠麥青青一逕斜寂寞遊人寒食後夜來風雨送梨

花又云宜男漫作後庭草不似櫻桃千子紅又云悠悠  
楚水流如馬恨紫愁紅滿平野野土千年怨不平至今  
燒作鴛鴦瓦又云擣麝成塵香不減拗蓮作寸絲難絕  
金陵云花庭忽作青蕪國謝公墅歌云朱雀航南繞香  
陌謝郎東墅連春碧鳩眠高柳日方融綺榭飄颻紫庭  
客文掀方罿花參差心陣未成星滿池四座無喧梧竹  
靜金蟬玉柄俱持頤對局含嚥見千里都成已得長蛇  
尾江南王氣繫踈襟未許苻堅過淮水蔡中郎墳云古

墳零落野花春聞說中郎有後身今日愛才非昔日莫  
拋心力作詞人過陳琳墓云曾於青史見遺文今日飄  
蓬過此墳詞客有靈應識我朝才無主亦憐君石麟埋  
沒藏春草銅雀荒涼對暮雲莫怪臨風倍惆悵欲將弓  
劍學從軍秘書省有賀監草題詩作云越溪漁客賀知  
章任達憐才愛酒狂鴻鵠葦花隨釣艇蛤蜊菰菜夢橫  
塘出籠鸞鶴歸遼海落筆龍蛇滿壞牆李白死來無醉  
客可憐神彩弔殘陽

李義山西挾翫月五言云露索秦宮井風絃漢殿簾歸  
墅云渠獨村春急旗高社酒香蟬云五更疎欲斷一樹  
碧無情煩君最相警我亦舉家清哭著明寄飛卿云何  
因攜庾信同去哭徐陵陳後宮云茂苑城如畫闕門瓦  
欲流還依水光殿更起月華樓侵夜鸞開鏡迎冬雉獻  
裘從臣皆半醉天子正無愁楚宮云歌成猶未唱秦火  
入夷陵公子云歸應衝鼓半去不待笙調子初金溪作  
云戰蒲知雁唼皴月覺魚來越鷺云去應逢阿母來莫

害皇孫無題云錦長書鄭重眉細恨分  
明月云姮娥無粉黛只是逞嬋娟壽安  
主出降云事等和殊族恩殊睦本枝四  
郊多壘在此禮恐無時公主嫁田承嗣  
之子承嗣握兵而驕詩意歎唐朝之姑息  
與嫁冒頓烏孫無異末句言諸節鎮皆有  
子皆欲尚主何以待之昭肅挽詩云海迷  
求藥使雪隔獻桃人哭劉蕡云空聞遷賈  
誼不待相孫弘裴明府居云試墨書新竹  
張琴和古松陳後宮云渚蓮參法駕沙鳥犯  
鈎陳鄭大有隱居云石梁高

鴻月樵路細侵雲題李蒼壁舊著思玄賦新編雜擬詩  
撰彭陽公誌云敢伐不加點尤當無媿辭詠懷寄舊僚  
云僕馭嫌夫懦孩童笑叔癡小男方嗜栗幼女漫憂葵  
聖女祠七言云一春夢雨常飄瓦盡日靈風不  
滿旗又曾題淮西碑云點竄堯典舜典字塗改  
清廟生民詩公之斯文若元氣先時已入人肝脾  
寄令狐學士云賡歌太液翻黃鵠從獮陳倉獲碧  
雞杜工部蜀中離席云雪嶺未歸天外使松州猶駐殿

前軍楚宮云已聞佩響知腰細更辨絃聲覺指纖無題  
云扇裁月魄羞難掩車走雷聲語未通井絡云堪教故  
君成杜宇可能先主是真龍北齊云小蓮玉體橫陳夜  
已報周師入晉陽寄令狐郎中云休問梁園舊賓客茂  
陵秋雨病相如過李家園云惟有夢中相近分卧來無  
睡欲何如嫦娥云嫦娥應悔偷靈藥碧海青天夜夜心  
隋宮云紫泉宮殿鎖烟霞欲取蕪城作帝家玉璽不緣  
歸日角錦帆應是到天涯於今腐草無螢火終古垂楊

有暮鴉地下若逢陳後主豈宜重問後庭花籌筆驛云  
魚鳥猶疑畏簡書風雲長為護儲胥徒令上將揮神筆  
終見降王走傳車管樂有才真不忝關張無命欲何如  
七夕云由來碧落銀河畔可要金風玉露時馬嵬云此  
日六軍同駐馬當時七夕笑牽牛如何四紀為天子不  
及盧家有莫愁九日云曾共山公把酒時霜天白菊繞  
階墀十年泉下無消息九日樽前有所思不學漢臣裁  
苜蓿空教楚客詠江離郎君官貴施行馬東閣無因得

再窺錦瑟云莊生曉夢迷蝴蝶望帝春心託杜鵑滄海  
月明珠有淚藍田日煥玉生煙相傳瑟有適怨清和四  
音于此二聯見之或云乃令狐楚家青衣名渾河中云  
九廟無塵八馬迴奉天城壘長春苔咸陽原上英雄骨  
半向君家養馬來無題云春風自共何人笑枉破陽城  
十萬家絕句云臨邛不見馬相如更欲南行問酒壘行  
到巴西覓譙秀巴西惟是有寒蕪宮妓云珠箔輕明拂  
玉墀披香新殿闢腰支不須看盡魚龍戲終遣君王怒

偃師夕陽樓云花明柳暗繞天愁上盡重城更上樓欲  
問孤鴻向何處不知身世自悠悠吳宮云龍檻沉沉水  
殿清禁門深掩斷人聲吳王宴罷滿宮醉日暮水漂花  
出城鈞天云上帝鈞天會衆靈昔人因夢到青冥伶倫  
吹裂孤生竹却為知音不得聽庭筠與商隱同時齊名  
時號溫李二人詩記覽精博才思流麗其浮艷者類徐  
庾其切近者類姚賈義山之作尤鍛鍊精粹探索幽微  
不可草草看世傳飛卿傲婦翁亦可見其不拘

鄭谷五言云春陰妨柳絮月黑見梨花又云粥蔬貧潔  
淨中酒病風流又云染岸蒼苔古翹沙白鳥鳴又云潮  
來無別浦木落見他山夕陽云長天急遠鴻潯陽縣廳  
云野泉當案落汀鷺入衙飛又云縣官清且儉深谷有  
人家一徑入寒竹小橋穿野花碓喧春澗滿梯倚綠桑  
斜自說年來稔前村酒可賒七言云愛僧不愛紫衣僧  
又云酒醒蘚砌花陰轉病起漁舟驚跡多又云夜深雨  
絕松堂靜一點山螢照寂寥又雪云亂飄僧舍茶煙濕

逸云蜂彈窓紙塵侵硯鳥鬪庭花露滴琴寄隱者云長  
松夜落釵千股小巷春添水半腰失鶴云幾時翔集來  
華表每日沉吟看畫屏安貧云謀身拙為安蛇足報國  
危曾將虎鬚殘春云樹頭蜂抱花鬚落池面魚吹柳絮  
行八月六日云御衣空惜侍中血國璽幾危皇后身倚  
醉云分明窓下聞裁剪獻過欄干喚不膺醉著云漁翁  
醉著無人喚過午醒來雪滿船寄道侶云夜來雪壓前  
村竹剝見溪南幾尺山暮春云四時最好是三月一去

不迴惟少年亂後野塘云世亂他鄉見落梅野塘晴暖  
獨徘徊船衝水鳥飛還住袖拂楊花去却來季重舊遊  
多喪逝子山新賦極悲哀眼看朝市成陵谷始信昆明  
是劫灰翠碧鳥雲天長水遠網羅稀保得重重翠碧衣  
挾彈少年多害物勸君莫近五陵飛哭花云曾愁香結  
破顏遲今見妖紅委地時若是有情爭不哭夜來風雨  
葬西施美成詞云葬楚宮頌國本此 鬚髻云髻根鬆慢玉釵垂指點  
花枝又過時坐久暗生惆悵事映人勻却淚胭脂韓偓

與吳融同時為詞臣偓忠于唐為朱三面斥貶責不悔  
如捋虎鬚之句人未嘗誦似為香奩所掩及朱三慕弑  
偓羈旅于閩時王氏割據偓詩文只稱唐朝官職與淵  
明稱晉甲子異世同符余讀其集而壯其志錄其警聯  
于編內三數篇自述其玉堂遭遇唐季非復承平舊觀  
而待詞臣之禮猶然存之以補金鸞記之闕

吳融和李學士秋夕禁直偶雪云硯冰憂詔急燈燼惜  
更殘重陽日荊州云舊國莫歸戎馬亂故人何在塞鴻

來丹陽云山帶梁朝陵路斷水連劉尹宅基平岐下聞  
子規云但有花知啼血處更無猿替斷腸哀還俗尼云  
三峽却為行雨客九天曾是散花人兵後經汴云金鑛

有苔人拾得蘆花無土鳥銜將過九成宮云魏公碑字

封蒼蘚文帝泉聲落野田

碑乃歐陽率更書  
豈魏公有別碑乎

宋玉宅云

已懷湘浦招魂事更憶高唐說夢時杏花云獨照影時

臨水畔最含情處出牆頭裴公洛居云門前立使修書

懶花下留賓壓酒忙過鄧城縣云未知堯桀誰非是可

使彭殤有短長楊花云百花長恨風吹落惟有楊花獨  
愛風潮云暮去朝來無定期桑田長被此聲移蓬萊若  
探人間事一日還應兩度知山僧云石臼山頭有一僧  
朝無香積夜無燈近嫌俗客知蹤跡擬向中方斷石層  
廢宅云風飄碧瓦雨摧垣却有隣人為鑠門幾樹好花  
空白盡滿庭荒草易黃昏放魚池涸蛙爭聚栖燕梁空  
雀自喧不獨淒涼眼前事咸陽一火便成原題湖城縣  
西槐樹云零落欹斜北路中盛時曾識太平風晚迷天

仗歸春苑暮送鸞旗指洛宮一自煙塵生薊北更無消息幸關東而今只有孤根在鳥啄玉穿沒亂蓬吳子華詩五言合作絕少七言佳者不減致光致光以忤朱三貶竄于華詩有南遷七絕未知所坐何罪往往坐致光之黨

羅隱題方干詩云九霄無鶴板雙鬢老漁舟懷益夷庚云中原正兵馬相見是何時菊云千歲白衣酒一生青女霜臺城云兵來吾有計金井玉杓欄歲除夜云厭寒

思暖律畏老惜殘更兒童不諳事歌吹待天明寄顧紹  
宗云青山無路入白髮滿頭生鶯聲云金屋夢初覺玉  
關人未歸牡丹云若教解語應傾國任是無情亦動人  
黃河云解通銀漢應須曲纔出崑崙便不清又云三十  
年後知誰在何必勞君見太平遊禪智寺云思量只合  
騰騰醉煮海平陳一夢中江令宅云還有徃年金梵井  
牧童樵叟等閒窺籌筆驛云時來天地皆同力運去英  
雄不自由建康云庾舅已能窺帝室王郎還是預人家

又云欲起九原看一遍秦淮聲急日西斜夏州胡常侍  
云仍聞隴蜀猶多事深喜將軍未白頭魏令公附卷索  
句云馬上固慚銷髀肉幄中尤羨愈頭風送梅處士云  
亂離且喜身俱在存沒那堪耳更聞題張逸人所居云  
芳樹文君機上錦遠山孫壽鏡中眉詠史云徐陵筆硯  
珊瑚架趙勝賓朋玳瑁簪中元夜泊淮口云錦帆天子  
狂魂魄應過揚州看月明寄竇常侍云噴香瑞獻金三  
尺舞雪佳人玉一圍早發云酷憐一覺平明睡長被雞

聲惡破除鄴城云英雄亦到分香處能共常人校幾多  
西施云西施若解傾吳國越國亡來又是誰故都云至  
竟不如隋煬帝破家猶得到揚州嚴陵灘云世祖昇遐  
夫子死原陵不及釣臺高

范公雲臺不及釣臺高之句本此

詠月云蟾

向靜中矜爪距兔隈明處弄精神嬌娥老大應惆悵倚  
泣蒼蒼桂一輪關臺春望云越信功夫高似狗裴王氣  
力大于牛未知至竟將何用渭水涇川一向流題潤州

妙善寺前石羊云

孫權劉備常會于此

紫鬃蒼蓋此沉吟狠石猶存

事可尋漢鼎未分聊把手楚醪雖羨肯同心始皇陵云  
荒堆無草樹無枝懶向行人問昔時六國英雄漫多事  
到頭徐福是男兒鸚鵡云莫恨雕籠翠羽殘江南地暖  
龍西寒勸君不用分明語語得分明出轉難曲江云別  
愁如瘡避還來隱字昭諫新城人唐季有詩名膾炙人  
口有江東集十卷其詩自光啓以後廣明以前海內亂  
離乘輿播遷艱難險阻之事多見之賦詠時魏府節度  
使王智興學隱詩自號詩卷為偷江東集

劉文自問云自問彭城子何人接汝顛酒腸寬似海詩  
胆大如天入蜀云峽色侵天去江聲衆地來逢盧仝云  
上樓腰脚健懷土眼睛穿勸姚合酒云何曾見天上著  
得劉安宅答孟東野云酸寒孟夫子苦愛老父詩生澁  
有百篇謂是瓊瑤辭嘲荆鄉云白虹千里氣血頸一劍  
義報恩不到頭徒作輕生士姚秀才愛予小劍因贈云  
一條古時水向我手中流臨行鴻贈君勿薄細碎譽又  
少為俠行因酒殺人亡命會赦出折節讀書能詩聞韓

愈接天下士步歸之作冰柱雪車二詩出盧仝孟郊右後  
以爭語不能下賓客持愈金數斤去曰此諛墓中人得  
耳不若與劉君為壽愈不能止歸齊魯不知所終

後村詩話卷十二

欽定四庫全書

後村詩話卷十三

宋 劉克莊 編

韓愈古賦云一色之水可走而違天下湯湯曷其而歸  
五言云晴雲如擘絮新月似磨鎌和席八十二韻云多  
情懷酒伴餘事作詩人秋懷云屏首空好飲廉頗尚能  
飯又云歛退就新懦趨營悼前猛又云有如乘風船一  
縱不可繩哭楊兵曹凝陸歛州參云人皆期七十纔半

豈蹉跎數出知已淚自然白髮多晨興為誰慟還坐久  
滂沱論文與晤論已矣兩如何送石處士云長把種樹  
書人云避世士忽騎將軍馬自號報恩子風雲入壯懷  
泉石別幽耳鉅鹿師欲老常山險猶恃豈惟彼相憂固  
是吾徒耻去去事方急酒行可以起岐山下云丹穴五  
色羽其名為鳳凰昔周有盛德此鳥鳴高崗和聲隨祥  
風窈窕相飄揚聞者亦何事但知時俗康自從姬旦死  
千載閱其光吾君亦勤理遲爾一來翔路傍堠云堆堆

路傍堠一雙復一隻迎我出秦關送我入楚澤千以高  
山遮萬以遠水隔何當迎送歸緣路高厯厯雜詩云朝  
蠅不須驅暮蚊不可拍得時能幾時與汝恣咬昨涼風  
九月到掃地無蹤跡從仕云居閒食未足從仕力難任兩  
事皆害性一生恒苦心黃昏歸私室惆悵起嘆音棄置  
人間世古來非獨今醉贈張秘書云君書多態度鵠鵠  
春空雲東野動驚俗天葩吐奇芬張籍學古淡軒昂避  
鷄羣又云長安衆富兒盤饌羅羶葷不解文字飲惟能醉

紅裙送靈師云佛法入中國爾來六百年齊民逃賦役  
高士著幽禪韓公稱士友雖李翺湜籍不過三數篇或  
發于記序書尺牘惟與僧詩多四十餘韻或三四十韻其  
間多謔浪笑傲之語而緇流不悟往往欲附名集中以  
為榮寵可發千載一笑薦士云有窮者孟效愛材實雄  
驚冥觀洞古今象外逐幽好橫空盤硬語妥帖力排奡  
敷柔肆紓餘奮猛卷海潦榮華肖天秀捷疾愈響報行  
身踐規矩甘辱耻媚寵孟軻分邪正眸子看睭眇杳然

粹而精可以鎮浮躁魯侯國至小廟鼎猶納郜幸當擇  
珉玉寧有棄珪瑁此篇四十韻錄十韻于此孟東野失  
子云失子將何尤吾將上尤天汝實主下人與奪一何  
偏彼于汝何有乃令蕃且延此獨何罪辜生死旬日間  
上呼無時聞滴地淚到泉地祇為之悲瑟縮不得安乃  
呼大靈龜騎雲欵天門問天生下人薄厚胡不均天曰  
天地人由來不相關吾懸日與月吾繫星與辰日月相  
噬齧星辰踣而顛吾不汝之罪知非汝由緣且物各有

分孰能使之然有子與無子禍福未可原魚子滿母腹  
一一欲誰憐細腰不自乳舉族長孤懸鷗巢啄母腦母  
死子始蕃蝮蛇生子時坼裂腸與肝好子雖云好未還  
恩與勤惡子不可說鷗巢蝮蛇然有子且勿喜無子固  
勿嘆上聖不待教賢聞語而遷下愚聞語惑雖教無由  
悛大靈頓頭受即日以命還地祇謂大靈汝往告其人  
東野夜得夢有夫玄衣巾闊然入其戶三稱天之言再  
拜謝玄夫收悲以歡忻此篇甚奇古非樊宗師盧仝輩

所能道寄崔立之云傲兀坐試席深叢見孤羆四座各  
低面不敢挾眼窺升階揖侍郎歸舍日未欹佳句喧衆  
口考官敢瑕疵老婦願嫁女不約論財貨老翁不量分  
累月答其兒歡華不滿眼咎責塞雨儀寄崔立之五十  
餘韻其述崔丞塲屋才敏舉人之所喜誦押寬韻易押  
險韻難寬韻雖累至百有甚工緻益先生云孟生江海  
士古貌又古心騎驢到京國欲和薰風琴豈識天子居  
九重鬱沉沉一門百夫守無籍不可尋誰憐松桂性競

愛桃李陰顧我多慷慨窮簷時見臨清宵靜相對髮白  
聆苦吟荅孟郊云朝餐動及午夜諷恒至卯齒落云語  
訛默固好嚼廢軟還美余晚喪明歐陽公權祕書勸余  
閉目勿視援此二句頗有意味病中贈張十八云夜闌  
縱捭闔哆口踈眉龐勢侔高陽翁坐約齊橫降荅瀧吏  
篇不以風土之惡弱鰐魚之暴橫為憂而一篇三致意  
負罪引慝于身而無一語歸怨于上惟韓杜二公為然  
雙鳥詩舊注為佛老二氏作內云天公怪兩鳥各捉一

處囚若將火其書廬其居人其人矣然未云還當三千  
秋更起鳴相酬則二氏其陷溺人心深矣猛虎行云猛  
虎雖云惡亦各有匹儕羣行深谷間百獸望風低身食  
黃熊父子食赤豹聾擇肉于熊豹肯視兔與狸正晝當  
谷眠眼有百步威自矜無當對氣性縱以乖朝怒殺其  
子暮還食其妃匹儕四散走猛虎還孤棲孤鳴門兩旁  
烏鵲從噪之出逐猴入居虎不知所歸誰云猛虎惡中  
路正悲啼豹來銜其尾熊來攫其頤猛虎死不辭但慙

前所為虎坐無助死况如汝細微故當結以信親當結  
以私親故且不保人誰信汝為韓杜二公五言有至百  
韻者但韓喜押窄韻杜喜押寬韻以余觀之窄韻尤難  
如义魚詩押三蕭字十八韻語多警策精衛銜石填海  
云何慙刺客傳不著報譽名李員外寄紙筆云兎尖針  
莫並蘭净雪難如晚泊江口云二女竹上淚孤臣水底  
魂順宗皇后挽歌詞鳳飛終不返劍化會相從送鄭尚  
書赴南海云蓋海旗幢出連天觀閣開衙時龍戶集上

日馬人來風靜鷓鴣去官廉蚌蛤回退之五言云曾經  
聖人手議論安敢到然石鼓歌云陋儒編詩不收入二  
雅褊迫無委蛇孔子西行不到秦掎摭星宿遺羲娥秀  
才家無頭腦如此贈候喜云暫動還休未可期蝦行蛭  
渡似皆疑舉竿引線忽有得一寸纔分鱗與譽君欲釣  
魚須遠去大魚豈肯居沮洳記夢詩注家以為公左遷  
右庶子作時李逢吉當國公有和候喜筭詩二十六韻  
用事託意信如注家所言贈崔羣云何人有酒身無事

誰家多竹門可歛記夢云夜夢神官與我言羅縷道妙  
角與根我聽其言未云足捨我先度橫山腹側身上視  
谿谷盲杖撞玉版聲彭觥神官見我開顏笑前對一人  
壯非少壯非少者我七言六字常語一字難我以指撮  
白玉丹行且咀嚼行詰盤口前截斷第二句綽虛顧我  
顏不歡乃知仙人未賢聖護短憑愚邀我敬我寧屈曲  
自世間安能從汝巢神山公南遷因論佛骨忤憲宗意  
然亟相度及貴戚皆論救此詩所謂我寧屈曲自世間

安能從汝巢神山可見宗閔怙權植黨公崛強不屈意  
赤藤杖歌云赤藤為杖世未窺臺郎始攜自滇池滇王  
掃宮邀使者跪進再拜語啞咿繩橋柱過免傾墮性命  
造次蒙扶持途經百國皆莫識君臣聚觀逐旌麾共傳  
滇神出水獻赤龍拔鬚血淋漓入云羲和操火鞭暝到  
西極陸所遺幾重包裹自題署不以珍怪誇荒夷歸來  
捧贈同舍子浮光照手欲把疑空堂晝眠倚牖戶飛電  
著壁搜蛟螭玉川子月蝕詩一千六百七十一字韓公

病其繁省去千餘字然題為效玉川子作退之豈效人體者謙辭也醉留東野云昔年因讀李白杜甫詩長恨二人不相從吾與東野生並世如何復躡二子蹤東野不得官白首誇龍鍾韓子稍姦黠自慙青蒿倚長松伍頭拜東野願得終始如駟蛩東野不迴頭有如寸筳撞鉅鍾吾願身為雲東野變為龍四方上下逐東野雖有離別無由逢藍闌示湘云一封朝奏九重天夕貶潮陽路八千欲為聖朝除弊事豈將衰朽惜殘年雲橫秦嶺

家何在雪擁藍關馬不前知汝遠來應有意好收吾骨  
瘴江邊余常謂選古今詩先正惟歐韓曾范大儒惟周  
程張邵及近世朱張呂葉不可以詩論然諸老先生之  
集具存或未常深考而細味之或畏其名盛而不敢輕  
下注脚自唐以來李杜之後便到韓柳詩沉著痛快可  
以配杜但以氣為之直截者多雋永者少白詩云退之  
服硫黃一病竟不痊按退之作李干墓誌力抵其服餌  
金丹之謬其卒北歸之役常以病滿百日求免官張籍

祭詩具言其病有孺人侍藥之句初無服硫黃之說世傳公臨終呼諸僧語之云汝詳視吾手足無出外誑人云韓愈病癩死公達生如此安肯服剛劑求活徵之鍊秋石亦未詳所出

柳宗元五言云豈知干仞墜柢為一毫差又云引泉開故竇護藥挿新笆又海俗衣猶卉山夷髻不鬟又危根一以振齊斧來相尋又靈壽木不知為何物以柳氏詩攷之云柔條乍反植勁節常對生循玩足忘疲稍覺步

武輕安能事翦伐持用資徒行詠荆軻云千金奉短計  
匕首荆卿趨造端何其銳臨事竟趨趨慈父斷子首狂  
走無容軀夷城芟七族臺觀皆焚汚始期憂患弭卒動  
災禍樞秦皇本詐力事與桓公殊奈何効曹子實謂勇  
且愚世傳故多謬太史徵無且詠荆軻者多矣此篇勇  
且愚之評與淵明惜哉劍術疎之語同一意脉陶柳詩  
率含蓄不盡常使君黃溪祈雨見召云驕陽愆歲事良  
牧念蓄禽列騎低殘月鳴笳度碧虛稍窮樵客路遷駐

野人居谷口寒流淨叢祠古木疎焚香秋霧濕奠玉曉  
光初朏纏巫言報精誠禮物餘惠風仍偃草靈雨會隨  
車俟罪非真吏翻慚奉簡書晨詣超師院讀禪經云道  
人庭宇靜苔色連深竹日出霧露餘青松如膏沐贈江  
華長老云室空無侍者巾屨唯挂壁又云風窓疎竹響  
露井寒松滴道傍孤松往來所以為明好事者編竹成  
籬感而賦詩云孤松停翠蓋託根臨廣路不以險自防  
遂為明所誤幸逢仁惠意重此藩籬護猶有半心存時

將承雨露又田家云離落隔煙火農談四隣夕庭際秋  
虫吟疎麻方寂歷蠶絲盡輸稅機杼空倚壁里胥夜經  
過雞黍事筵席各言官長峻文字多督責東鄉後租期  
車轂陷泥澤公門少推恕鞭朴恣狼籍努力慎經營肌  
膚真可惜又云古道饒蒺藜紫迴古城曲蓼花被堤岸  
陂水寒更綠是時收穫竟落日多樵牧風高榆柳疎霜  
重梨栗熟行人迷去住野鳥競棲宿田翁笑相念昏黑  
慎原陸掩役夫張進骸云生死悠悠爾一氣聚散之偶

來紛喜怒奄忽已復辭為役孰賤辱為貴非神奇一朝  
纏息定枯朽無妍媸生平勤皂櫈判秣不告疲既死給  
轄櫬葬之東山墓奈何值崩湍蕩析臨路垂骭然暴百  
體散亂不復支從者幸告余嗟之涓然悲猶虎獲迎祭  
大馬有蓋惟佇立唁爾魂豈復識此為畚鍤載埋瘞溝  
瀆護其危我心得所安不謂爾有知掩骼著春令茲焉  
適其時及物非吾輩聊且顧爾私人南磽云秋氣集南  
磽獨遊亭午時迴風一蕭瑟林影久參差始至若有得

稍深遂忘渡羈禽響幽谷寒藻舞淪漪去國魂已遠懷  
人淚空垂孤生易為感失路少所宜索寞竟何事徘徊  
祇自知誰為後來者當與此心期入簡吳武陵云理世  
固輕士棄捐湘之湄陽光競四溟敲石安所施鏹羽集  
枯幹低昂互鳴悲朔雲吐風寒寂寥窮秋時君子尚容  
與小人守兢危慘悽日相視離憂坐自滋樽酒聊可酌  
放歌諒徒為惜無協律者窈眇絃吾詩七言云盛時一  
去貴反賤桃笙葵扇安可常人漁翁夜傍西巖宿曉汲

清湘燃楚竹煙銷日出不見人欸乃一聲山水綠嶺南  
江行云瘴江南去入雲煙望盡黃茆是海邊山腹雨晴  
添象跡潭心日暖長蛟涎射工巧伺遊人影颶母偏驚  
旅客船從此憂來非一事豈容華髮待流年柳州峒岷  
云郡城南下接通津異服殊音不可親青箬裏鹽歸洞  
客綠荷包飯趁虛人鵝毛禦臘縫山罽難骨占年拜水  
神哭呂衡州云衡岳新摧天柱峯士林顛頓泣相逢祇  
令文字傳青簡不使功名上景鐘三畝空留懸磬室九

原猶寄若堂封遙想荊州人物論幾迴中夜惜元龍跋  
烏詞云城上日出羣鳥飛鷗鷗爭赴朝陽枝刷毛伸翼  
和且樂爾獨落魄今何為無乃慕高近白日三足妬爾  
令爾疾無乃飢啼走路傍貪鮮攫肉人所傷翹肖獨足  
下叢薄口銜低枝始能躍還顧泥塗備蠻蟻仰看棟梁  
防燕雀左右六翮利如刀踊身失勢不得高支離無趾  
猶自免努力低飛逃後患韓柳齊名然柳乃本色詩人  
自淵明沒雅道俱熄當一世競作唐詩之時獨為古體

以矯之未嘗學陶和陶集中五言九十數篇雜之陶集  
有未易辨者其幽微者可翫而味其感慨者可悲而泣  
也其七言五十六字尤工五七言絕句已別選退之作  
羅池廟碑云侯常語部曲歐陽翼等曰明年吾死死而  
為神後三年降于州之後堂歐陽翼等見而拜之又云  
生能澤其民死能驚動禍福之又云過客李儀醉酒慢  
侮扶出即死恐非不語神怪之義王初寮詩云子厚文  
章百世師尋常稽首望羅池雷霆不碎韓詩板醉侮何

心怒李儀若為子厚分疏者

劉禹錫八陣圖云會有知兵者臨流指是非寄嚴司空云歡謠開竹棧拜舞擲桑弓早發云寒樹鳥初動霜橋人未行早秋集賢院云蕙草香書殿槐花點御溝又云問卜安冥數看方理病源送客云神林社日鼓茅屋午時雞和微之云櫪嘶無價馬庭發有名花又云昨宵鳳池客今日雀羅門又云興情逢酒在筋力上樓知又云遊魚將婢縱野雉見媒鷺又云殘兵疑鶴唳空壘辨鳥聲詠史云賈生明王道衛

館工車戲同遇漢文時何人居貴位初至長安云每行  
經舊處却想似前身不改南山色其餘事事新挿田歌  
云計吏語田夫長安真大處省門高軻峨儂入無度數  
昨來補衛士唯用筒竹布君看二三年我作官人去羅  
浮云夜宿峩高峰瞻空浩無際海黑天宇曠星辰來逼  
人是時當朏魄陰物恣騰振日光吐鯨背劍影開龍鱗  
倏若萬馬馳旌旗聳衡淪又如廣樂奏金石含悲辛疑  
其有巨靈怪物盡來賓陰陽迭用事乃俾夜作晨咄嗟

天雞鳴扶桑色昕昕赤波千萬里踴出黃金輪下視生  
物息霏如隙中塵醯雞仰甕口亦謂雲漢津世人信耳  
目方寸度大鈞安知視聽外怪愕不可陳搘衣曲云爽  
砧應秋律繁杵含淒風一一遠相續家家音不同戶庭  
凝露清伴侶明月中長裾委襞積輕佩垂璁瓈汗餘衫  
更馥細移麝半空報寒驚邊鴈促思聞候蟲天狼正芒  
角虎落定相攻盈篋寄何處征人如轉蓬古散調詞云  
讀得玄女符生當事邊時往來長秋間能帶雙鞬馳崩

騰天寶末塵暗燕南陰燿火入咸陽詔徵神武師是時  
占軍幕揷羽揚金羈萬夫列轅門觀射中戟支中宵倚  
長劍起視蚩尤旗陰風獵白草旗槊光參差曾擒白馬  
將虜騎不敢追貴臣上戰功名姓隨意移終歲肌骨苦  
他人印纍纍謁者既清宮諸侯各罷戲上將賜甲第門  
戰不可窺皆血下沾襟天高問無期却尋故鄉路孤影  
空相隨遊桃源云姹女飛丹砂青童護金液寶氣浮鼎  
耳神光生劍脊春望云田中牧豎燒芻狗陌上行人看

石麟澧州云梅藥覆階鈴閣煙雪峯當戶戟枝寒水亭避  
暑云琥珀殘烘疑漏酒水晶簾瑩更通風碁云鴈行布  
陣衆未曉虎穴得子人皆驚送僧云猿狹窺齋林葉動  
蛟龍聞呪浪花低寄令狐相公云少有一身兼將相更  
能四面占文章與歌者米嘉榮云近來時世輕先輩好  
染髭鬚事後生江陵道中云行到南朝征戰地古來名  
將盡為神又云檀裘君長迎風懼錦領酋豪蹋雪騎又  
云離別苦多相見少一生心事在書題又云隔簾惟見

中庭草一樹山榴依舊開又云階蟻相逢如偶語園蜂  
急去恐違程荆門道懷古云南國山川舊帝畿宋臺梁  
館尚依稀馬嘶古樹行人歇麥秀空城澤雉飛風吹落  
葉填宮井火入荒林化寶衣徒使詞臣庾開府咸陽終  
日苦思歸平齊行云開元皇帝東封時百神受職爭奔  
馳千鈞猛簾順流下洪波涵淡浮熊羆侍臣燕公秉文  
筆玉檢告天無愧詞當今獻孫承聖祖岳神望幸河宗  
舞青門大道屬車塵共侍歲蕤翠華舉牆陰歌云白日

左右浮天潢朝暉影入東西牆昔為兒童在陰戲當時  
意小覺日長東鄰侯家吹笙簧隨陰促促移象牀西隣  
田舍乏糟糠就影汲汲春黃梁因思九州四海外家家  
只占牆陰內莫言牆陰數尺間老卻主人如等閒西塞  
山云西晉樓船下益州金陵王氣漠然收千尋鐵鎖沉  
江底一片降幡出石頭夢得德宗朝已為郎官御史坐  
伾文黨久斥于外晚與樂天皆為牛橋賓客累官至侍  
從然八十餘矣既沒徵之有五言云併失鴛鴦侣空餘

麋鹿身只應嵩少下長作獨遊人

杜牧五言云韓彭不再生英雄皆為鬼又云少陵鯨海  
動翰苑鶴天寒又云大熱去酷吏清風來故人又云微  
雨池塘見好風襟袖知又云圓疑竊龍領色已奪雞冠  
又云青漢龍鬚絕蒼山馬鬣悲又云微雨秋裁竹孤燈  
夜讀書又云蓬蒿三畝居寬于一天下又云自嫌如匹  
素刀尺不由身又云誰知病太守猶得作茶仙又云四  
百年炎漢三十代宗周二三里遺堵八九所高丘又云

偃蹇松公老森嚴竹陣齊小蓮娃欲語幽芦稚相攜杜  
秋娘云京江水清滑生女白如脂其間杜秋娘不勞朱  
粉施老漸即山鑄後庭千蛾眉秋持玉彈醉與唱金縷  
衣漣既白首叛秋亦紅淚滋吳江落日渡灞岸綠楊垂  
聯裾見天子倩盼獨依依椒壁懸錦幕鏡奩蟠蛟螭伍  
鬟認新寵窈窕復融怡月上白璧門桂影涼參差金階  
露新重閒捻紫簫吹莓苔夾城路南苑鴈初飛紅粉羽  
林仗獨賜辟邪旗歸來煮豹胎饗飲不能飴咸池昇日

慶銅雀分香悲雷音後車遠事往落花時燕襍得皇子  
壯髮綠綾綾畫堂授傅姆夫人親捧持虎睛珠絡褓金  
盤犀鎮惟長楊射熊羆武帳弄啞呴漸拋竹馬劇稍出  
舞雞奇嶄嶄整冠佩侍宴坐瑤池眉宇儼圖畫神秀射  
朝暉一尺桐偶人江充知自欺王幽茅土削秋放故鄉  
歸鷺稜拂斗極迴首尚遲遲四朝三十載似夢復疑非  
潼闕識故吏吏髮已如絲却喚吳江渡舟人那得知歸  
來四隣改茂苑草菲菲清血洒不盡仰天知問誰寒衣

一疋素夜借隣人機我昨金陵過聞之為歎歎自古皆  
一貫變化安能推夏姬滅兩國逃作巫臣妻西子下姑  
蘇一舸逐鴟夷織室魏豹俘作漢太平基誤置代籍中  
兩朝尊母儀光武紹高祖本係生唐兒珊瑚破高齊作  
婢春黃糜蕭后去楊州突厥為閼氏女子固不定士林  
亦難期射鈞後呼父釣翁王者師無國要孟子有人毀  
仲尼秦因逐客令柄歸巫相斯安知魏齊首見斷筭中  
尾給喪蹙張翬廊廟冠峩危珥貂七葉貴何妨拒郢支

蘇武却生返鄧通終死饑主張既難測翻覆亦其宜地  
盡有何物天外復何之指何為而捉足何為而馳耳何  
為而聽目何為而窺已身不自曉此外何思維因傾一  
樽酒題作杜秋詩愁來獨長詠聊可以自怡杜秋娘詩  
蕭后去揚州突厥為閻氏按唐書蕭后國破沒於竇建  
德突厥處羅可汗遣使要之建德不敢留遂入于敵庭  
正觀四年太宗滅突厥以禮迎后至京師既入敵庭則  
為閻氏必矣寄小姪阿宜云小姪名阿宜未得三尺長頭

圓筋骨紫兩臉明且光去年學官人竹馬遶四廊指揮  
羣兒輩意氣何堅剛去歲冬至日拜我立我傍祝爾願  
爾貴仍且壽命長今年我江外今日生一陽憶爾不可  
見祝爾傾一觴陽德比君子初生至微茫排陰出九地  
萬物隨開張一似小兒學日就復月將勤勤不自己二  
十能文章我家公相家劍佩嘗玎璫舊第開朱門長安  
城中央第中無一物萬卷書滿堂家集二百編上下馳  
皇王多是撫州寫今來五紀強尚可與爾讀劬爾為賢

良經書括根本史書閱興亡高摘屈宋艷濃薰班馬香  
李杜泛浩浩韓柳摩蒼蒼近者四君子與古爭強梁願  
爾一祝後讀書日日忙一日讀十紙一月讀一箱朝廷  
用文治大開官職場願爾出門去取官如驅羊大明帝  
宮闈杜曲我池塘我若是潦倒看汝爭翹翔總語諸小  
道此詩不可忘少年行云官為駿馬監職帥羽林兒兩  
綬藏不見落花何處期獵敲白玉鐙怒袖紫金槌田竇  
長眉醉蘇辛曲讓岐豪持出塞節笑別遠山眉捷報雲

臺賀公卿拜壽危七言云南朝四百八十寺多少樓臺  
烟雨中又云蕭條市邑如蜂尾早晚干戈識虎皮又云  
四海一家無一事將軍携鏡泣霜毛又云九原可作  
吾誰與師友聊耶聊曼容又云秋山春雨閒吟處倚遍  
江南寺寺樓又云杜詩韓筆愁來讀似倩麻姑癢處爬  
又云商女不知亡國恨隔江猶唱後庭花又云自說江  
湖不歸事阻風中酒過年年又云公道世間惟白髮貴  
人頭上不曾饒班竹簾云分明知道湘妃泣何忍將身

臥淚痕又云無端有寄閒消息背挿金釵笑向人宮人  
塚云少年入內教歌舞不識君王到死時別家云初歲  
嬌兒不識爺別爺不拜手吒叉拊頭一別三千里何日  
迎門却到家贈獮射云已落雙鵠血尚新鳴鞭走馬又  
翻身憑君莫射南來鴈恐有家書寄遠人河湟云元載  
相公曾借筋憲宗皇帝亦蜀神旋見衣冠就東市忽遺  
弓劍不西巡牧羊驅馬雖戎服白髮丹心盡漢臣惟有  
涼州歌舞曲流傳天下樂闇人絕句云王子紋楸一路

饒最宜簷雨竹蕭蕭得年七十更萬日與子期於局上  
銷故洛城云鋼黨豈能留漢鼎清談空解識胡兒千燒  
萬戰坤靈死慘慘終年鳥雀悲九日齊山登高云江涵  
秋影鴈初飛與客攜壺上翠微塵世難逢開口笑菊花  
須插滿頭歸但將酩酊酬佳節不用登臨歎落暉古往  
今來只如此牛山何必更沾衣橫江館云孫家兄弟晉  
龍驤馳騁功名業帝王至竟江山誰是主苔磯空屬釣  
魚郎又云鏡中絲髮悲來慣衣上塵痕拂漸難惆悵

江湖釣竿手却遮西日向長安按牧之門戶貴盛文章  
獨步一時其詩機鋒湊泊如秋月春山挹之無盡少時  
不羈有書記平安之謗及住廿四橋頭猶有綠葉成陰  
子滿枝之恨若未忘情於色界者晚節自誌其墓臺卿  
自誌與淵明自挽何異非世之怖死懼化者所可及也頃  
見考亭稱牧行草書能不愧於詩有頡頏李杜之目乃  
知文公亦愛其才

後村詩話卷十三

欽定四庫全書

後村詩話卷十四

宋 劉克莊 編

白居易原上草云野火燒不盡春風吹又生清明云留  
餚和冷粥出火煮新茶扇云引秋生手裏藏月入懷中  
太湖石云峰駢仙掌出鏤折劍門開又云常恐國史上  
但記鳳與麟又云昨日延英對今日崖州去又云所恨  
薄命身嫁遲別日迫又云為君一日恩悞妾百年身又

云我無縮地術君非馭風仙又云行年三十九歲暮  
日斜時讀靈運詩大必籠天海細不遺草樹又云未得  
無生心白頭亦為天又云戀月夜同宿愛山晴共看江  
州云野水多于地人煙半在船又云老色日上面歡悰  
時去心今既不如昔後當不如今又云欲識往來頻青  
蕪成白路又云笑勸狂伶酒閒吟短李詩又云犬吠村  
胥閑蟬鳴織婦忙又云成人男作草事鬼女為巫又云  
吏徵魚戶稅人納火田租又云醉曾衝宰相驕不揖金

吾又云散吏閒如客貧州冷似村又云憂方知酒聖貧  
始覺錢神又云雞鳴一覺睡不博早朝人又云量大嫌  
甜酒才高笑小詩又云性靈閒似鶴顏狀古于松又云  
若不為松喬即須作臯夔又云微月初三夜新蟬第一聲  
又云病聞和藥氣渴聽碾茶聲又云小巢織巧婦新葉  
長慈姑又云玉柄鶴翎扇銀覲雲母漿又云秋風滿衫  
淚泉下故人多又云佛容為弟子天許作閒人又云鬪  
閒僧尚閑較瘦鶴為肥又云不能留姹女爭免作袁翁

又云婢能尋本草犬不吠醫入又云同時六學士五相一漁翁又云園葵烹佐飯林葉掃添薪又云有一燕趙士言貌甚奇瓌日日酒家去脫衣典數杯問君何落拓云僕生草萊地寒命且薄君門乏良媒亦有同門生光升青雲梯貴賤交道絕朱門扣不開及歸種禾黍三歲旱為災入山燒黃白一旦化為灰處處去不得却歸酒中來陶詩云夷齊各一身窮餓未為難先生有五男與之同饑寒同此意又云三年典郡歸所得非金帛天竺石兩片

華亭鶴一隻還就無塵坊仍求有水宅豈獨為身謀安  
吾鶴與石又云榮名與壯齒相避如朝暮時命始欲來  
顏色已先去又云泥壇方合矩鑄鵠圓中規鑪橐一以  
動瑞氣紅輝輝二物正訴合厥狀何恠竒綢繆夫婦體  
狎獵魚龍姿又云試問池臺主多為將相官終身不曾  
到惟展宅圖看又云昔作少學士圖形入集賢今為老  
居士寫貌寄香山鶴毳變玄髮雞膚換朱顏前形與後  
貌相去三十年七言云一叢暗淡將何比淺碧籠裙襯

紫巾又云藥圃茶園為產業野麋林鶴是交游又云  
失寵故姬歸院夜沒番老將上樓時照他樂許人腸斷  
玉兔銀蟾遠不知又云曾犯龍鱗容不死欲騎鶴背覓  
長生又云每被老元偷格律苦教短李伏歌行又云猶  
嫌小戶長先醒不得多時住醉鄉又云洛陽女兒面似  
花河南大尹頭如雪又云琴書何必求生產與女猶勝  
與外人又云綺羅二八圍寶榻組練三千夾將壇又云  
爭得大裘長萬丈與君都蓋洛陽城又云大有高門鑠

空宅主人到老不曾歸又云貧添莊鳥吟聲苦病久韓  
康藥債多又云柘枝紫袖教丸藥羯鼓蒼頭遣種蔬又  
云直應人世無風月始是心中忘却時又云冷落若為  
留客住冰池霜竹雪鬚翁又云漢容黃綺為逋客堯故  
巢由作外臣哭劉夢得云益酒英雄君與操文章微婉  
我知丘賢豪雖歿精靈在應共微之地下遊又蟬螟殺  
敵蚊巢上蠻觸交爭蝸角中應似諸天觀下界一微塵  
內鬪英雄又云秦磨利刀斬李斯齊燒沸鼎烹酈其可

憐黃綺入商洛閒卧白雲歌紫芝彼為道醞几上盡此  
作鸞鳳天外飛去者逍遙來者死乃知禍福非天為又  
云禍福茫茫不可期大都早退以先知當君白首同歸  
日是我青山獨往時顧索素琴應不暇憶牽黃犬定難  
追麒麟作脯龍為醢何似泥中曳尾龜新豐折臂翁云  
新豐老人八十八頭鬚眉鬚皆似雪元孫扶向店前  
行左臂憑肩右臂折問翁臂折來幾年兼問致折何因  
緣翁云貫屬新豐縣生逢聖代無征戰慣聽梨園歌管

聲不識旗槍與弓箭無何天寶大徵兵戶有三丁點一  
丁點得驅將何處去五月萬里雲南行聞道雲南有瀘  
水椒花落時瘴烟起大軍徒涉水如湯未過十人二三  
死村南村北哭聲哀兒別爺娘夫別妻皆云前後征蠻  
者千萬人行無一迴是時翁年二十四兵部牒中有名  
字夜深不敢使人知偷將大石錐折臂張弓鞬旗俱不  
堪從茲始免征雲南骨碎筋傷非不苦且圖捷退歸鄉  
土此臂折來六十年一肢雖廢一身全至今風雨陰寒

夜直到天明痛不眠痛不眠終不悔且喜老人今獨在不然當時瀘水頭身死魂飛骨不收應作雲南望鄉鬼萬人塚上哭呦呦老人言君聽取君不聞開元宰相宋開府不賞邊功防黷武又不聞天寶宰相楊國忠欲求恩幸立邊功邊功未立生人怨請問新豐折臂翁八駿圖云穆王八駿天馬駒後人愛之寫為圖日行萬里速如飛穆王獨乘何所之四荒八極踏徵遍三十二蹄無歇時屬車軸折追不及黃屋草生棄若遺瑤池西赴

王母宴七廟經年不親薦璧臺南與盛姬遊明堂不復  
朝諸侯白雲黃竹歌聲動一人荒樂萬人愁至今此物  
世稱珍不知房星之精下為祲賣炭翁云賣炭翁伐薪  
燒炭南山中滿面塵灰烟火色兩鬢蒼蒼十指黑賣炭  
得錢何所營身上衣裳口中食可憐身上衣正單心憂  
炭賤願天寒夜來城外一尺雪曉駕炭車輶冰轍牛困  
人饑日已高市南門外泥中歇翩翩兩騎來是誰黃衣  
使者白衣兒手把文書口稱勅迴車叱牛牽向北一車

炭千餘斤官使驅將惜不得半疋紅紗一丈綾繫向牛頭充炭直官牛云官牛官牛駕君車灌水崖邊搬載沙一石沙幾斤重朝載暮載將何用載向五門官道西綠槐陰下鋪沙堤昨來新拜右丞相恐怕泥塗汙馬蹄右丞相馬蹄踏沙雖淨潔牛領牽車欲流血右丞相但能濟人治國調陰陽官牛領穿亦無妨鹽商婦云鹽商婦多金帛不事田農與蠶績南北東西不失家風水為鄉船作宅本是揚州小家女嫁得西江大商客綠鬟富去金釵多皓

腕肥來銀釧窄前呼蒼頭後叱婢問爾因何得如此婿  
作鹽商十五年不屬州縣屬天子每年鹽利入官時少  
入官家多入私官家利薄私家厚鹽鐵尚書遠不知何  
況江頭魚米賤紅鱠黃橙香稻飯飽食濃粬倚柂樓兩  
朵紅顛花欲綻鹽商婦有幸嫁鹽商終朝美飯食終歲  
美衣裳好衣美食有來處亦須慚愧桑弘羊桑弘羊死  
已久不獨漢時今亦有

元稹榴花五言云委作金爐焰飄成玉砌瑕憲宗挽歌

云狼星如要射猶有禹湖弓又云俊鶻度海食應龍昇天行又云漸恐鯨鯢大波濤及九州又云新筭蹠犀株落梅翻蝶翅又云箏絃玉指調粉汗紅綃拭又云綠綾碧筠綾香秔白玉團又云佞存真妾婦諫死是男兒又云义魚江火合喚客谷神應又云花態繁于綺闌情軟似綿又云勁芟鼈足斷精貫虱心穿又云望夫身化石為伯首如蓬又云不如元不識俱作路人行又云乘我羊柯馬蒙茸大如瓶又云亭亭巧于削一一大如拱槎

李賀感諷云合浦無明珠龍洲無木奴足知造化力不  
給使君須越婦未織作吳蠶始蠕蠕縣官騎馬來綈色  
虹紫鬚懷中一方板板上數行書不因使君怒焉得詣  
爾廬越婦拜縣官桑芽今尚小會待春日宴綠車方擲  
掉越婦通言語小姑具黃梁縣官踏浪去簿吏復登堂  
又云都門賈生墓青蠅久斷絕寒食搖揚天墳景長肅  
殺皇漢十二帝惟帝稱睿哲一夕信豎兒文明永淪歇  
秦王飲酒云酒酣唱月使倒行沙路曲云帝前動笏移

南山秋來云秋墳鬼唱鮑家詩恨血千年土中碧夢登天  
云黃塵清水三山下更變千年如走馬遙望齊州九點  
烟一泓海水杯中瀉秦宮詩云飛窓複道傳觴飯十夜  
銅盤膩燭黃又云研桂燒金待曉筵白鹿清鯉夜半煮  
美人梳頭歌云雙鸞開鏡秋水光解鬟臨鏡立象牀一  
編香絲雲撒地玉釵落處無聲膩纖手却盤老鷄色翠  
滑寶釵簪不得又云背人不語向何處下皆自折櫻桃  
花雁門太守行云黑雲壓城城欲摧甲光向日金鱗開

角聲滿天秋色裏  
塞上燕脂凝夜紫  
半捲紅旗臨易水  
霜重鼓寒聲不起  
報君黃金臺上意  
提攜玉龍為君死  
全銅仙人辭漢歌  
云茂陵劉郎秋風客  
夜聞馬嘶曉無跡  
畫欄桂樹懸秋香  
三十六宮土花碧  
魏宮牽車指千里  
東闕酸風射眸子  
空將漢月出宮門  
憶君清淚如鉛水  
衰蘭送客咸陽道  
天若有情天亦老  
攜盤獨出月荒涼  
渭城已遠波聲小  
呂將軍歌云呂將軍騎赤兔  
獨攜大膽出秦關  
金粟堆邊哭陵樹  
北方逆氣汚青天  
劍

龍夜叫將軍閒將軍振袖揮劍鍔玉闕朱城有門閣檻  
檻銀龜搖白馬傳粉女郎火旗下恒山鐵騎請金槍遙  
聞簾中花箭香西郊寒蓬葉如刺皇天親載養神驥廄  
中高杆排塞蹄飽食青芻飲白水圓蒼低迷蓋張地九  
州人事皆如此苦篁調嘯引云請說軒轅在時事伶倫  
採竹二十四伶倫採之自崑丘軒轅詔遣中分作十二  
伶倫以之正音律軒轅以之調元氣當時黃帝上天時  
二十三管咸相隨惟留一管人間吹無德不能得此管

此管沉埋虞舜祠笙簧引云吳絲蜀桐張高秋空白凝雲  
頽不流江娥啼竹素女愁李憑中國彈笙簧崑山玉碎  
鳳凰叫芙蓉泣露香蘭笑十二門前融冷光二十三絲  
動紫皇女媧鍊石補天處石破天驚逗秋雨夢入神山  
教神嫗老魚跳波瘦蛟舞吳質不眠倚桂樹露脚斜飛  
濕寒免長吉歌行新意險語自有蒼生以來所無樊川云  
極騷人墨客筆力盡古人文章變態非長吉不足以當  
之高軒過乃其總角時所作若宿構者然其母曰是兒

欲嘔出心乃已知子莫若母豈非苦吟而得者歟唐雜記云賀性傲忽其詩為母中表投之溷中故傳于世者絕少悲夫使吾有中表如賀當濯薺薇水薰玉蕤香方敢開卷此中表豈鼻塞不知香臭者歟

戴叔倫贈李山人唐云柳條將白髮相對共垂絲汝南別董校書云擾擾倦行役相逢陳蔡間何為百年內不見一人閒對酒惜餘景問程愁亂山秋風萬里至又出穆陵關贈康老人洛云一篇飛入九重門樂府喧喧聞至尊宮中美人

皆唱得七貴因云盡相識不脫鞅裘輕錦綺長吟佳句  
掩笙歌賢王貴主於我厚駿馬蒼頭如已有暗將心事  
隔風塵盡擲年光逐杯酒青門幾度見春歸折柳尋花  
送落暉叔倫仕至容管觀察使半山選其詩凡四十七  
首五七言絕句已入選今摘出集中平淡可翫味者瀏  
亮切事情者趙南塘題天台戴式之詩藁云台嶺散仙  
人詩家小叔倫式之由此名重有石屏集南塘為選取

若干首

楊巨源獻聖壽云爐烟添柳重宮漏出花遲老將云功成封寵  
將力盡到貧鄉聖恩洗雪鎮州寄獻裴相公云天借春光洗綠  
林戰塵收盡見花陰好生本是君王德忍死何妨壯士心曾賀  
截雲翻柵遠仍聞斬凍下營深井陘昨日雙旗入蕭相無言淚  
濕襟此謂田布知魏兵必叛殺身以自明楊公勇去之節退之一序萬古不朽內  
云國子司業楊公方以能詩訓後進按變以九德教胄子周以  
德行道藝造士未聞以能詩訓後進者唐人或以一聟  
擅終身之貴然楊公可敬初不在詩亟相愛惜不能留

童子釣遊不敢棄可以為人師矣世傳楊公苦吟常掉其頭至老雖未嘗吟而掉頭自若所作尤圓熟然其間忠憤悲慨如聖恩洗雪鎮州獻裴相之篇可補唐史之闕皇甫冉張公洞五言云何時種桃核幾度看桑田寄僧云一入春山裏千峰不可尋長安路云結束趨平樂暇翩抵狹斜溫湯云丞相金錢賜平陽玉輦過魯儒求一謁無路獨如何傷美人云專房獨見寵傾國衆皆聞宿嚴維宅送包七云歲儲無別墅寒服羨鄰機出塞云吹

角出塞門前瞻即胡地三軍盡回首皆洒望鄉淚轉念  
關山長行看風景異由來征戍客各負輕生義故齊王贈  
承天皇帝挽歌云禮盛追崇日人知友悌恩舊居從代  
邱新壠入文園鴻寶仙書祕龍旂帝服尊蒼蒼松裏月  
萬古此高原送魏十六還蘓州云秋夜深深此送君陰  
蟲切切不堪聞歸舟明日毗陵道迴首姑蘓是白雲

皇甫曾送人往荊州云帆影連三峽猿聲近四鄰送李  
中丞云關河三晉路賓從五原人兩皇甫詩昔常畧評

之補闕詩尤多御史所作絕少然亦多佳句

陸龜蒙五言云汀州歲晚弋籬落露寒春出戶手先筇  
見人頭未帽七言云終須揀取幽棲處老檜雙成便作  
門

皮日休旅舍除夜云挑燈猶故歲聽角已新年陪江西  
裴公遊襄州延慶寺云不著前驅驚野鳥唯將後乘載  
詩人襄州春遊云映柳認人多錯誤透花窺鳥最分明  
岑年單絞何曾著莫道猖狂似禰衡過雲居院玄福上

人舊居云重到雲居獨悄然隔簾窺影尚疑禪不逢野老來聽法猶見隣僧為引泉龕上已生新石耳壁間空帶舊茶烟南宗弟子時時到泣把山花奠几筵皮陸皆唐季詩客陸隱于江湖皮咸通八年登第二人素友善倡和尤多昔之和詩者和意而已惟皮陸必和韻有系至百韻者皮有七愛詩為房杜李西平盧鴻元魯山李太白白居易七人而作以嵩山處士令次三大臣李翰林白少傳名位不輕列于處士縣令之下其高致卓識如

此

杜荀鶴春宮怨云風暖鳥聲碎日高花影重經賈島墓  
云山根三尺墓人口數聯詩弔李翰林云誰移耒陽冢  
來此作吟鄰感遇云海枯終見底人死不知心雪云江  
湖不見飛禽影嵩谷唯聞折竹聲擁袍公子莫言冷中  
有樵夫跣足行哭貝韜云交朋來哭我來歌喜傍山家  
葬薜蘿四海十年人事變似君埋少不埋多溪興云山  
雨溪風捲釣絲丸甌蓬底獨斟時醉來睡著無人喚流

下前溪也。不知題覺禪和云少見脩行得似師茅堂佛。  
像亦隨時禪衣衲後雲藏線臘火熏來雪印眉耕地誠侵  
連塚土伐薪教護帶巢枝有時問著經中事却道山僧  
總不知荀鶴詩在羅隱方干之下半山選唐詩只取四  
首其五言最多然失之容易七言差勝

李涉山中無奈何云無奈落葉何紛紛滿衰草疾來無  
氣力擁戶不能掃欲訪雲外人都迷上山道又無奈澗  
水何喧喧夜鳴石踈林透斜月散亂金光滴欲訪澗底人

路窮澗水碧又無奈牧童何牧牛喫我竹隔林呼不應  
叫笑如生鹿欲報田舍翁更深不歸屋遊鶴林寺云野  
寺尋春花已遲<sub>北</sub>嵩惟有兩三枝平明攜酒猶堪醉  
為報春風且莫吹涉詩見於半山詩選者三十餘首其絕  
句已別選古體三篇鶴林一絕皆有意味存之以備一家  
顧非熊送樸處士歸新羅云少年離本國今去已成翁  
客夢孤舟裏鄉山積水東鼈沉崩巨岸龍闢出遙空學  
得中朝語將歸誰與同非熊況之愛子况詩云老人喪愛

子日暮泣成血老人年七十不作多時別非熊亦有詩  
名今存者僅百餘篇

朱慶餘上江州李使君云得在朝廷少還因諫諍多杭州送蕭校書云別君猶有淚學道漫經年又云粧罷低聲問夫婿畫眉深淺入時無絕句為籍所稱然他作皆不如此

韓翃寄武陵李少府云楚歌催晚醉蠻語入新詩翃寒食絕句為德宗嘉獎擢知制誥有與翃同名者時相審

之御批云日暮漢宮傳蠟燭輕烟散入五侯家以比韓  
翃唐人尤重德宗詩有聞說德宗曾到此吟詩不見倚  
闌干之句又云曾唱正元供奉曲又嘲宋濟為惡詩唐  
諸帝中當以帝詩為第一翃所作皆善今集中警句可  
摘出者殊寂寥簡短恐有散軼者

嚴維酬劉員外云柳塘春水慢花塢夕陽遲維嘗與皇  
甫冉劉長卿唱和然前輩惟稱其柳塘花塢一聯

曹松送方干云汲水疑山動揚帆覺岸行商山野叟云木弓

未得長離手猶與官家射麝香南海旅次雲南國正當無雁處故園誰道有書來松詩半山選十四篇摘三聯於此

劉希夷代白頭翁云年年歲歲花相似歲歲年年人不同又云此翁白頭真可憐伊昔紅顏美少年希夷詩雖則天時人然格律漸有天寶以後之風矣

盧象雜詩云家居五原上征戰是平生獨負山西勇誰當塞上名死生遼海戰雨雪薊門行諸將封侯盡論功獨不成象詩入半山選者十首姑摘出其一

鮑溶五言云豈惟親賓散鳥鼠移巢窠又云楚老幾代人種田煬帝宮零落池臺勢高低禾黍中又云雪壯冰亦堅凍澗如平地幽人毛褐暖笑就糟牀醉喚入空谷應開火寒猿至拾薪煮新粟看鼎古書字忽憶南澗僧衣巾多雲氣露脚尋逸人諸量意中事又云北風送微寒行旅動遠程憂人席不暖殘月馬上明飄飄歧路間長見月初生重嶂曉色淺踈猿寒啼清感此長嘆息百年何所營駙馬宅云閒遣青琴飛小雪自看碧玉破甘

爪又云襄陽太守沉碑意身後身前幾年事湘江千歲  
未為陵水底魚龍應識字鮑防雜感云漢家海內承平  
久萬國戎王皆稽首天馬常銜苜蓿花胡人特獻葡萄  
酒五月荔枝初破頤朝離象郡夕函闕雁飛不到桂陽  
嶺馬走皆從林邑山甘泉御果垂仙閣日暮無人花  
自落遠物皆重近皆輕雖有德不如鶴觀諸書經南  
豐序引者皆不刊之言鮑溶詩清約謹嚴違理者少之  
評惟深于詩者知之世謂子固不能詩謬矣唐時有鮑

防者亦有詩名唐文粹載二鮑詩防稍開拓今錄其雜感篇于此

司空圖山中云川明虹照雨樹密鳥衝人又云坡暖冬生筍松涼夏健人又云夜短猿悲減風和鵲喜虛又云孤螢出荒池落葉穿破屋雜言云烏飛飛免蹶蹶朝來暮去催時節女媧只解補青天不解煎膠黏日月唐自朱三跋扈以來黠者陰贊問鼎之謀悖者明獻改物之說奉璽六臣皆喬木世臣子孫于時間關亂世挺然自

立不踐二姓之庭惟司空表聖韓致光二士而已致光大節為香奩所累不若表聖賦詠多雅人莊士之言舊有其集曾摘數聯餘不能悉記

項斯送華陰隱者云世人空識面弟子莫知年欲別云歸期無歲月客路有風濤隱者云養龍於淺水寄鷺在高枝寄坐夏僧云多因束帶熱更憶剃頭涼贈道者云自說身輕健今年數夢飛哭南流人云官庫空收劍鑾僧共起墳知名人尚少誰為錄遺文日東病僧云雲水絕歸路來時風送

船不言身後事猶坐病中禪深壁藏燈影疎窓出艾烟  
已無香土信起塔寺門前舊宮人七言云自出先皇玉  
殿中衣裳不更染深紅宮釵折盡垂空鬢內扇穿多減  
半風桃熟亦曾君手賜酒闌猶候妾歌終如今還寄城邊  
住御水東流意不通斯詩在方干秦系之間少而工

儲光羲野田黃雀云噴噴野田雀不知軀體微窮老一顏  
舍黍多桑樹稀無棗猶可食無桑何以衣蕭條空蒼暮  
相引時來歸邪路豈不捷渚田豈不肥水長路且憂惻

惻與心違

崔國輔對酒吟云行行日將夕荒村古塚無人跡蒙籠  
荆棘一鳥飛屢唱提壺沽酒喫古人不逢酒不足遺恨  
精靈傳此曲寄言世上諸少年平生且盡杯中醞

楊衡哭李象云黃雞白犬不將來寂寞空餘葬時路草死花  
開年復年後人知是何人墓

李端贈康洛云同時獻賦人皆盡共壁題詩君獨在  
于武陵過王第云不知彈鋏客何處感新恩

劉商醉後口號云春草秋風老此身一瓢長醉任家貧  
醉來還愛浮萍草漂寄官河不屬人

羊士諤酬蕭使君出妓夜讌云玉顏紅燭忽驚春微步  
凌波拂暗塵自是當歌斂眉黛不應惆悵為行人余選  
晚唐數家詩既盡又雜取儲光羲崔國輔楊衡李端于  
武陵劉商羊士諤七人一聯半句以附益之七人非晚

唐體



後村詩話卷十四